



孔子集語卷下

永嘉薛據纂

四明范欽訂

子出衛第十一

子出衛東門逢姑布子卿子卿迎而謂子貢曰
是為魯孔丘與得堯之志舜之目禹之頸臯陶
之喙從前視之盜盜乎似有土者從後視之高
肩弱脊循循固得之轉要下四寸此惟不及四
聖者也子貢曰吁子卿曰子何患焉汗面而不

惡葭喙而不藉羸乎若喪家之狗子何患焉子
貢以告子無辭而獨辭喪家之狗曰丘何敢乎
賜汝不見喪家之狗歟既歛而椁布器而祭顧
望無人意欲施之今上無明王下無賢方伯王
道衰政教失強凌弱衆暴寡百姓縱心莫之紀
綱是故以丘爲欲當之者也丘何敢乎哉韓詩外傳
○子貢曰葉公問政於夫子子曰政在於附近
而來遠魯哀公問政子曰政在於論臣齊景公
問政子曰政在於節用三君問政夫子應之不

同然則政有異乎子曰荆之地廣而都狹民有
離志焉故曰在於附近而來遠哀公有臣三人
內比周以惑其君外障距諸侯賓客以蔽其明
故曰政在論臣齊景公奢於臺榭淫於苑囿五
官之樂不解一旦而賜人百乘之家者三故曰
政在節用見尚書大傳
○東郭子思問於子貢曰

夫子之門何其雜也子貢曰夫槩括之旁多枉
木良醫之門多疾人砥礪之旁多頑鈍夫子聞
之曰脩道以俟天下來者不止是以雜也見尚書大

傳

○子曰參女以爲明主爲勞乎昔者舜左禹而右皋陶不下帝而天下治○子曰古之刑者省之今之刑者繁之古者有禮然後有刑是以刑省也今也反是無禮而齊之以刑是以繁也○子如衛人謂曰公甫不能聽獄子曰非公甫不能聽獄也有罪者懼無罪者恥民近禮矣○子曰聽訟者雖得其情必哀矜之死者不可復生鬻者不可復贖也○子曰吳越之俗男女同川而浴其刑重而不勝由無禮也中國之教內

外有別男女不同梳架不同巾櫛其刑重而勝由有禮也語曰夏后不殺不刑罰有罪而民不輕犯○子曰古之聽民者察貧窮哀孤獨矜寡宥老幼不肖無告是故老而受刑謂之悖弱而受刑謂之○不赦過謂之逆率過以小謂之損○子曰今之聽民者求所以殺之古之聽民者求所以生之不得其所以生之道乃刑殺君與臣會焉○子曰君子不可以不學見人不可以不飾不飾無貌無貌不敬不敬無禮無禮不

立夫遠而光者飾也近而逾明者學也譬之如
汙邪水潦集焉菅蒲生焉從上觀之誰知其非
源水也○子曰文王得四臣丘得四友吾得回
也門人加親是非胥附邪吾得賜也遠方之士
至是非奔走邪吾得師也前有光後有輝是非
先後邪吾得由也惡言不至於耳是非禦侮邪
故文王有四臣免於虎口丘有四友以禦侮○
子曰心之精神是謂聖

並見尚書大傳

顏叔子第十二

顏叔子獨處于室鄰之嫠婦又獨處于室夜暴
風雨至而室壞婦人趨而至顏叔子納而使執
燭放乎旦而蒸盡縮屋而繼之自以爲辟嫌之
不審矣若其審者宜若魯人然魯人有男子獨
處室鄰之嫠婦獨處于室夜暴風雨至而室壞
婦人趨而就之男子閉戶而不納婦人自牖與
之言曰子何爲不納我乎男子曰吾聞之也男
女不六十不同居吾子幼吾亦幼不可以納子
婦人曰子何不若柳下惠嫗不逮門之女國人

不稱其亂男子曰柳下惠固可吾固不可吾將以吾不可學柳下惠之可孔子曰欲學柳下惠者未有似於是者也春秋 呂氏○孔子俟子貢久而

不至謂弟子占之遇鼎皆曰折足賜不來顏淵

掩口而笑子曰回也哂謂賜來也無足乘舟而

至子貢朝至春秋 呂氏○子曰少成若天性習慣如

自然見大戴禮○子曰國有道雖加刑無刑也國無

道雖殺之不可勝也見董仲舒春秋繁露○子曰君子不

盡利以遺民故詩云彼有遺秉此有不斂穧伊

寡婦之利○子曰不患貧而患不均繁露○子曰

我欲載之空言不如見之行事之深切著明也

司馬遷傳○邱費之宰二大夫數叛患之以問孔子

孔子曰陪臣執國命采長數叛者邑有城池之

固家有甲兵之藏故也季氏說而墮邱墮費公羊

傳何休註○子曰吾志在春秋行在孝經何休公羊傳序○

孔子見羅者所得皆黃口也孔子曰黃口盡得

大爵獨不得何也羅者對曰黃口從大爵者不

得大爵從黃口者可得孔子顧弟子曰君子慎

所從不得其人則有網羅之患說苑○子路問曰
 治國何如子曰在於尊賢而賤不肖子路曰范
 中行氏尊賢而賤不肖何為其亡也子曰范中
 行氏尊賢而不能用賤不肖而不能去也賢者
 知其不用已也怨之不肖者知其賤已也讎之
 怨讎並與欲無亡得乎說苑

齊侯問第十三

齊侯問於晏子曰為政何患對曰患善惡之不
 分公曰何以察之對曰審擇左右左右善則百

僚各得其所宜而善惡分孔子聞之曰善哉○

子曰本不正者未必倚始不盛者終必衰春秋

之義有正春無亂秋有正君無危國易曰建其

本而萬國理失之毫釐差以千里故君子貴建

本而重其始○子曰中入之情有餘則侈不足

則儉無禁則淫無度則失縱欲則敗故飲食有

量衣服有節宮室有度蓄聚有數車器有限以

防亂之源也○子曰夏道不亡商德不作商德

不亡周德不作周德不亡春秋不作春秋作而

後君子知周道亡也故上下相虧也猶水火之相滅也人君不可不察而大盛其臣下此私門盛而公室毀也○子路問於孔子曰請釋古之學而行由之意可乎孔子曰不可昔者東夷慕諸夏之義有女其夫死爲之納私婚終身不嫁不嫁則不嫁矣然而非貞節之義也蒼梧之弟娶妻而美好請與兄易忠則忠矣然非禮也今子欲釋古之學而行子之意庸知子用非爲是用是爲非子不慎其初雖欲悔難哉○孔子曰

惡惡道不能甚者則其好善道亦不能甚好善道不能甚則百姓之親之也亦不能甚○子曰吾於甘棠見宗廟之美也尊其人敬其位古聖之道幾音基哉○仲尼見梁君梁君問曰吾欲長有國吾欲列都之得吾欲民不惑吾欲士竭力吾欲使日月當時吾欲使聖人自來吾欲使官府治爲之柰何仲尼曰丘聞之兩君相親則長有國君惠臣忠則列都之得母殺不辜母釋罪人則民不惑益士祿賞則竭其力尊天敬鬼則

日月當時善爲刑罰則聖人自來尚賢使能則官府治○魯有父子訟者康子曰殺之孔子曰未可殺也夫民不知子父訟之不善者久矣是則上過也上有道是人亡矣康子曰夫治民以孝爲本今殺一人以戮不孝不亦可乎孔子曰不孝者不教而誅之是殺不辜也三軍大敗不可誅也訟獄不治不可刑也上陳之教而先服之則百姓從風矣躬行不從而后俟之以刑則民知罪矣夫一仞之牆民不能踰百仞之山童

于升而遊焉凌遲故也今仁義凌遲久矣能謂民不踰乎

並見說苑

文王第十四

文王似元年武王似春周公似正月文王以王季爲父太任爲母太姒爲妃武王周公爲子泰顛閔天爲臣其本美矣武王正其身正其國以正天下伐無道刑有罪一動天下正其事正矣春致其時萬物皆生君致其道萬人皆治周公戴已而天下順其誠矣○孔子曰存亡禍福在

已而已天災地妖不能殺也昔殷王帝辛爵生
烏於城之隅占者曰小而生巨國家必社帝辛
喜不治國家尤暴極甚外寇乃至遂亡殷國此
逆天之時詭福而反得禍也殷王武丁之時刑
法弛廢桑穀共生于朝七日而大拱占者曰桑
穀野物也而生于朝意朝亡乎武丁恐駭側身
修行興滅國繼絕世舉逸民三年之後遠方之
君重譯而朝者六國此迎天之時詭禍而反得
福也故妖孽者天之所以警天子諸侯也惡夢

者所警士大夫也妖孽不勝善政惡夢不勝善
行○孔子讀易至損益喟然而嘆子夏避席曰
夫子何嘆孔子曰自損者益自益者損吾是以
嘆也子夏曰然則學不可益乎孔子曰否天之
道成者未嘗得久也夫學者以虛而受之故曰
苟得持滿則天下之善言不得入其耳矣昔堯
履天子之位猶允恭以持之虛靜以待下故百
載而逾盛迄今而猶章昆吾自臧而滿意窮高
而不衰故當時而虧迄今而愈惡是非益損之

徵歟○哀公問於孔子曰人若何而可取也孔子對曰毋取掛音鈞者毋取捷者毋取口銳者掛者太利不可盡用捷者必欲兼人不可爲法也口銳者多誕而寡信後恐無驗也夫弓矢調而後求其中焉馬慤愿而後求其良焉人不忠信重厚而多智能如此人者譬猶豺狼不可近也是故先仁信之誠者然後親之於是人之有智能者然後任之○魯人有贖臣妾於諸侯者取金於府子貢贖人於諸侯而還其金孔子聞之

曰賜失之矣聖人舉事可以移風俗而教導可施於百姓非獨適其身之行也今魯國富者寡貧者衆矣贖而受金則爲不廉不受則後莫敢贖自今以後魯人不復贖矣並見說苑

齊桓公第十五

齊桓公出獵逐鹿於谷中見老人而問之曰何谷對曰愚公之谷桓公曰何故曰以臣故名之公曰視爾之狀非庸人何以爾名對曰臣故畜牝牛而大賣之以買駒少年曰牛不能生馬遂

持駒去聞者以臣爲愚故谷以臣得名桓公歸以告管仲管仲曰此夷吾之愚也使堯在上皐陶爲理安有取人駒者乎愚公知治獄不正故與之耳請退而修政孔子曰弟子記之桓公霸君管仲賢佐猶有以智爲愚者況不及桓公管仲者乎○孔子與齊景公坐左右曰周使來言周廟焚齊景公問孔子曰何廟也孔子對曰必釐王廟也詩云皇皇上帝其命不忒天之報人必報其德禍亦如之釐王變文王之制輿馬奢

侈不可振也故天殃其廟以是知之景公曰何不殃其身曰天以文王之故若殃其身文王之祀無乃絕乎故殃其廟以彰其過也左右入報曰是釐王之廟也景公驚曰聖人之智不亦大乎○孔子將行無蓋弟子曰子夏有之可以行孔子曰商之爲人短於財吾聞與人交者推其長違其短故能久長矣○子讀詩至正月之六章懼然曰不逢時之君子豈不殆哉從上依世則廢道違上離俗則危身世不與善而已獨行

之故曰非其時恐不得終焉○孔子曰不觀高岸何以知顛墜之患不臨深淵何以知沒溺之患不觀海上何以知風波之患失之者其在此乎士慎三者無累於人

並見說苑

公索氏第十六

公索氏將祭亡其牲子曰公索氏比及三年必亡後一年而亡弟子曰夫子何以知之孔子曰祭之爲言索也索也者自盡也乃孝子所以盡其親也將祭而亡其牲則餘所亡者多矣吾以

此知其將亡也○魯哀公問孔子曰吾聞忘之甚者徙而忘其妻有諸乎孔子對曰此非忘之甚也忘之甚者忘其身昔夏桀貴爲天子富有四海不修禹之道毀壞辟法裂絕世祀荒淫于樂沈酗于酒其臣左師觸龍諂諛不止湯誅桀左師觸龍身死四支異處此忘其身者也哀公變色曰善○顏回將西游問於孔子曰何以爲身孔子曰恭敬忠信可以爲身恭則免於衆敬則人愛之忠則人與之信則人恃之矣○子路

行辭於仲尼曰敢問新交取親若何言寡而可行若何長爲善士而無犯若何仲尼曰新交取其禮乎○仲尼曰史鮒有君子之道三不仕而敬上不祀而敬鬼直能曲於人○子路盛服入見孔子孔子曰是檐檐音籤者何也昔者江水出於岷山其始也大足以濫觴及至江之津也不方舟不避風不可渡也非唯下流衆川之多乎今若衣服甚盛顏色充盈天下孰肯加若者哉

子路趨出改服而入孔子曰由汝記之吾語汝賁於言者華也奮於事者伐也夫色智而有能者小人也故君子知之爲知之不知爲不知言之要也能之爲能不能爲不能行之至也言要則知行要則仁旣知且仁夫何有加矣哉○趙襄子見圍於晉陽罷圍有功臣高赫無功而受上賞張孟談曰晉陽之中高赫無功與上賞何也襄子曰吾在厄中唯赫不失臣主之禮子以功驕寡人也與赫上賞不亦可乎孔子聞之曰

趙襄子可謂善賞士矣賞一人而天下之人臣莫敢失君臣之禮○孔子閒居喟然嘆曰銅鞮伯華無死天下其有定矣子路曰其爲人也何若子曰其幼也敏而好學壯也勇而不屈老也有道而能下人子路曰何謂也孔子曰由汝不知吾聞以衆攻寡無不消也以貴下賤無不得也周公制天下之政而下士七十人豈無道哉欲得士故也有道而能下天下之士君子乎哉○子曰可也簡簡者易野也易野也者無禮文

也孔子見子桑伯子子桑伯子不衣冠而處弟子曰夫子何爲見此人乎子曰其質美而無文吾將說而文之孔子去子桑伯子門人不說曰何爲見孔子乎曰其質美而文繁吾欲說而去其文故曰文質脩者謂之君子有質無文謂之易野子桑伯子易野欲同人道於牛馬故仲弓曰太簡○孔子至齊郭門外遇一嬰兒挈一壺相與俱行其視精其心正其行端孔子謂御者曰趣驅之趣驅之韶樂將作孔子至彼聞韶三

孔子集註 卷一
月不知肉味

並見說苑

子夏問第十七

子夏問仲尼曰顏淵爲人何若曰回之信賢於
丘也曰子貢爲人何若曰賜之敏賢於丘也曰
子路爲人何若曰由之勇賢於丘也曰子張爲
人何若曰師之莊賢於丘也子夏避席而問曰
然則四者何爲而事先生子曰坐吾語汝回能
信而不能反賜能敏而不能屈由能勇而不能
怯師能莊而不能同兼此四者丘不爲也夫所

謂至聖之士必見進退之利屈伸之用者也○

孔子觀於吕梁懸水四十仞環流九十里有丈

夫將涉之孔子使人止之丈夫不錯措音意遂渡

而出孔子曰子有巧乎有道術乎所以能入而

能出者何也丈夫曰始吾入先之以忠信吾之

出又從以忠信忠信錯吾軀於波流而吾不敢

用吾私所以能入而復出也孔子謂弟子曰水

尚可以忠信義久而身親之況於人乎○子路

持劍孔子問曰安用此乎子路曰古者以自衛

孔子曰君子以忠爲質以仁爲衛不出環堵之內而聞千里之外不善以忠化寇暴以仁圍何必劔乎○孔子曰行身有六本本立焉然後可爲君子體有義矣而孝爲本喪有禮矣而哀爲本戰陣有隊矣而勇爲本治政有理矣而能爲本居國有禮矣而嗣爲本生財有時矣而力爲本置本不固無務豐末親戚不說無務外交事無終始無務多業聞記不言無務多談比近不說無務修遠是以反本修邇君子之道也○孔

子曰鯉君子不可以不學見人不可以不飾不飾則無根無根則失理失理則不忠不忠則失禮失禮則不立夫遠而有光者飾也近而愈明者學也譬之汙池水潦注焉菅蒲生之從上觀之誰知其非源也○孔子謂子路曰汝何好曰好劔孔子曰非此之問也請以汝之所能加好學豈不可哉子路曰學有益乎孔子曰人君無諫臣則失政士無教友則失德狂馬不擇其策操弓不反於檠正弓之器木受繩則直人受諫則

聖受學重問孰不順成毀仁惡士見近於刑君子不可不學也子路曰南山有竹弗揉自直斬而射之通乎犀革又何學焉孔子曰括而羽之鏃而砥礪之其入不益深乎子路拜曰敬受教哉

並見說苑

楚伐陳第十八

楚伐陳焚西門使降民脩之孔子過之不軾子路問曰禮過三人則下車二人則軾陳脩門者衆矣夫子不軾何也孔子曰丘聞之國亡而不

知不智知而不爭不忠忠而不死不廉今陳脩門者不行一於此丘故不爲軾也○顏淵問仲尼曰成人之行何若子曰成人之行達乎情性之理通乎物類之變知幽明之故睹遊氣之源若此則可謂成人既知天道行身以仁義飭身以禮樂夫仁義禮樂成人之行也窮神知化德之盛也○子貢問死人有知乎無知也孔子曰吾欲言死者有知也恐孝子順孫妨生以送死也吾欲言死者無知也恐不孝子孫棄而不葬

也賜爾欲知死人有知將無知也死徐自知之猶未晚也○孔子曰移風易俗莫善於樂安上治民莫善於禮是故聖人脩禮文設庠序陳鐘鼓天子辟雍諸侯泮宮所以行德化也○孔子之楚有獻魚者孔子不受獻魚者曰天暑市遠賣之不售思欲棄之不若獻之君子孔子再拜受命使弟子掃地將祭之弟子曰人將棄之而夫子將祭之何也孔子曰吾聞之務施而不腐餘財者聖人也受聖人之饋可無祭乎○孔子

曰北方有獸其名曰蟹前足鼠而後足兔是獸也甚愛蛭蛭巨虛也食得甘草必齧以遺蛭蛭巨虛蛭蛭巨虛見人將來必負蟹以走蟹非性愛蛭蛭巨虛也為其假足故也二獸者亦非性愛蟹也為其得甘草而遺之也夫禽獸昆蟲猶知比假以相報也況於士君子之欲興名利於天下者乎並見說苑○孔子席不正不坐割不正不食席不正不坐不飲盜泉之水積正也漢許慎說文○士尹池為荆使於宋司城子罕止而觴之南

家之牆擁於前而不直西家之潦經其宮而不止士尹池問其故子罕曰南家鞅工也吾徙之其父曰吾恃鞅而食者三世今徙是國之求鞅者不知吾處也吾無以食顧相國之憂吾不食也爲是吾不徙西家高吾室卑潦之經吾宮也利爲是故不禁也士尹池歸荆適興兵欲攻宋士尹池諫於王曰宋不可伐也其君賢其相仁賢者得民仁者能用人攻之無功乃爲天下笑荆釋宋而攻鄭孔子聞之曰夫修之廟堂之上

而折衝千里之外者司城子罕之謂也

新序○

楚共王出獵而遺其弓左右請求之共王曰止楚人遺弓楚人得之又何求焉仲尼聞之曰惜乎其不大也亦曰人遺弓人得之而已何必楚

說苑

○虞人芮人質成於文王入文王之境見

其人民遜爲士大夫入其國見其士大夫遜爲公卿二國者相謂曰其人民遜爲士大夫其士大夫遜爲公卿其君亦遜以天下而不居矣二國者未見文王歸而遜其所爭爲閒田孔子曰

大哉文王之道乎其不可加矣不動而變無爲而成敬謹恭已而虞芮自平○曾子芸瓜誤斷其根曾皙怒投大杖擊之曾子仆地有頃而蘇蹙然而起曰大人教參得無疾乎孔子聞之以告門人曰參來勿內三日曾子因客而見孔子孔子曰汝聞瞽聵有子曰舜乎舜之事父也索而使之未嘗不在側求而殺之未嘗可得小箠則待大箠則走以逃暴怒也立體而不去殺身以陷父不義不孝孰是大乎○孔子旣不得用

於衛將西見趙簡子至河而聞竇鳴犢舜華之死也曰竇鳴犢舜華晉國之賢大夫也趙簡子未得志之時須此兩人而後從政及其已得志殺之丘聞之刳胎殺夭則麒麟不至竭澤涸魚則蛟龍不游覆巢毀卵則鳳凰不翔何則君子重傷其類也夫鳥獸之於不義也尚知避之而況丘哉乃還

並見說苑

孔子先第十九

孔子先世宋緡公之長子曰弗父何何世爲宋

大夫其曾孫曰正考父考父之子曰孔嘉父嘉
 為華父督所殺其子奔魯始為陬人孔子之曾
 大父曰孔防叔防叔生伯夏伯夏生叔梁紇以
 勇力聞於諸侯禱於尼丘生孔子故名之曰丘
 字仲尼孔子之生魯襄公之二十二年也孔子
 為兒嬉戲常陳俎豆設禮容幼而喪父葬於防
 山母不以告及母死不知其墓乃殯於五父之
 衢有過而疑焉因問之得於聊曼父之母然後
 合葬於防孔子長九尺六寸人皆謂之長人蓋

未有知之者年三十有四魯大夫孟僖子病且
 死屬說與何忘事之而學禮焉以定其位闕里世載

○齊景公政廩丘於孔子以為養子不受曰吾

聞君子當以功受祿今說景公未之行而賜廩

丘其不知丘甚矣遂辭而行說苑○孔子遭難於

陳蔡之境絕糧弟子皆有飢色孔子歌兩柱之

間子路入見曰夫子之歌禮乎孔子不應曲終

而曰君子好樂為無驕也小人好樂為無懼也

其誰知之子不我知爾從我者乎子路不悅授

干而舞三終而出及至七目孔子脩樂不休子
路愠見曰夫子脩樂時乎孔子不應樂終而曰
由昔齊桓公霸心生於莒勾踐霸心生於會稽
晉文霸心生於驪氏故居不幽者思不遠身不
約者智不廣庸知不遇於是與明日免於阬子
貢執轡曰二三子從夫子而遇此難也其不忘
可也孔子曰惡是何言也語不云乎三折肱而
成良醫夫陳蔡之間丘之幸也二三子從丘皆
幸人也吾聞人君不困不成王士不困不成行

昔者湯困於莒文王困於羑里秦穆公困於殽
齊桓公困於長勺勾踐困於會稽晉文困於驪
姬夫困之道從寒之暖暖之及寒也唯賢者獨
知其難而言之也易曰困亨貞大人吉說苑○孔

子困於陳蔡之間七日不食藜羹不糝弟子皆
有飢色孔子讀詩書治禮樂不休子路進諫曰
凡爲善者天報以福爲不善者天報以禍今先
生積德行為善久矣意者尚有遺行乎奚居之
隱也孔子曰由來汝不知吾語汝子以智者爲

無知乎則王子比干何爲剖心而死子以諫者
爲必聽邪伍子胥何爲抉目於吳東門子以廉
者爲必用邪伯夷叔齊何爲餓死首陽之下子
以忠爲必用邪鮑莊何爲而肉枯故荆公子高
終身不顯鮑焦抱木而立之推登山焚死古聖
人君子博學深謀不遇時者衆矣豈獨丘哉賢
不肖者才也爲不爲者人也遇不遇者時也死
生者命也有其才不遇其時雖才不用苟遇其
時何難之有故舜耕歷山而陶於河畔立爲天

龍銜王包金泥玉檢封盛書五老飛為流星上

入鼎

論語識

○孔子院於陳弦歌於館中夜有人

長九尺餘皂衣高冠大咤聲動左右子路引出

與戰于庭仆于地乃大鯢魚也

鯢大計切鮪也

子曰吾

聞物老則群精依之因衰而至此其來也夫六

畜之物及龜蛇魚鼈及草木久者皆神為妖怪

故謂之五酋五酋五行之方皆有其物酋者老

也故物老皆為怪殺之則已夫何患焉

曾子第二十

曾子從仲尼在楚心動問母母曰思之齧指孔

子聞之曰參之至誠精感萬里搜神記○子曰天

子之德感天地動八方是以功合神者稱皇德

合天地者稱帝義名曰王帝王世紀○孔子與聞魯

國之政齊人懼曰孔子為政必伯伯則吾地近

焉我為之先并矣蓋致地焉犁鉏曰請先沮之

沮之不可致地庸遲乎於是選國中女子八十

人皆衣文衣舞康樂馬三十駟以遺魯君魯君

游觀終日卒受之三日不朝孔子遂行師已送

之曰夫子則非罪孔子曰吾歌可夫歌曰彼婦

之口可以出走彼婦之謁可以死敗優哉游哉

聊以卒歲師已反季桓子曰孔子何言師已以

實告桓子歎曰夫子罪我以群婢故也孔子去

魯十三年適衛者五適陳蔡者再適曹適宋適

鄭適葉適楚各一諸侯皆莫能用卒自衛反魯

蓋定公十四年由大司寇攝相事時也齊歸女

樂孔子行孔子世家○魯沈猶氏曰飲其羊飽之以

市欺人公慎氏有妻而惡慎潰氏奢侈驕佚魯

孔子行孔子世家○魯沈猶氏曰飲其羊飽之以

市鬻牛馬者善豫價孔子為魯司寇沈猶氏不
敢飲其羊公慎氏出其妻慎潰氏踰境而走鬻
牛馬者不豫價布正以持之也既為司寇季孟
墮揮郈費之城齊人歸所侵魯之地由積正之
所致也故曰其身正不令而行劉向新序○楚昭王
召孔子欲使執政而封以書社七百里子西謂
楚王曰楚之祖封於周為子男五十里今孔子
述三王之法明周召之業王若用之則楚安得
世世堂堂方數千里乎文王在豐武王在鎬

里之君卒王天下今孔丘得據土壤賢弟子為
佐非楚之福也昭王乃止史記○衛孔文子將攻
子太叔問策於仲尼仲尼辭不知退而命載而
行季康子以幣迎孔子孔子歸魯孔子去魯凡
十四年而反乎魯孔子世家○孔子曰孝弟之至通
乎神明光于四海舜之謂也新序○孔子謂曾子
曰君子不以利害義則耻辱安從生哉官怠於
宦成病加於少愈禍生於怠惰孝衰於妻子察
此四者慎終如始新序○子曰聽其音者聞其疾

而不聞其舒望遠人者察其貌而不察其形立乎定哀之間而指乎隱桓隱桓之日遠矣穀梁子
○定公會齊侯於夾谷孔子相兩君就壇兩相相揖齊人鼓譟而起欲執魯君孔子歷階而止不盡一等命司馬止之孔子視歸乎齊侯曰兩君之合而夷狄之人何為來為齊侯謝曰寡人之過也退而屬二三大夫曰大夫率君行古人之道二三子率我入夷狄之俗何為乃罷會齊君使優施舞於魯君之幕下孔子曰笑君者罪

當死司馬行法首足異門出齊人懼來歸鄆謹龜陰之田蓋為此也因是以見有文事必有武

備孔子夾谷之會見之

公羊傳

○孔子之宋臣簡

子將殺陽虎孔子似之甲士圍孔子之舍子路奮戟將下鬪孔子止之曰何仁義之不免俗也夫詩書之不習禮樂之不修也是丘之過也若似陽虎非丘之罪也命也夫由歌吾和汝子路歌孔子和之三終而甲罷說苑○孔子母顏氏徵在游大澤之陂夢黑帝使請已已往夢交語曰

汝乳必於空桑之中覺則若感生丘於空桑首
類尼丘山故以為名孔演孔子生之夜有二蒼
龍自天而下有二神女擎香霧於空中以沐徵
在先是有五老列於庭則五星之精有麟吐玉
書於闕里人家云水精之子繼商周而素王出
故蒼龍繞室五星降庭徵在知其為異乃以繡
紱繫麟角而去至敬王末魯定公二十四年魯
人鉏商田於大澤得麟以示夫子夫子知命之
終乃抱麟解紱而涕泗焉伏侯古○仲尼魯人

生不知易本偶筮其命得旅請益於商瞿氏曰
子有聖智而無位孔子泣而曰天也命也鳳鳥
不來河無圖至嗚呼天命之也嘆訖而息志庖犧

氏先

○仲尼牛脣吐教陳機受度又仲尼虎掌

是謂威射胸應雉是謂儀古又仲尼龜脊又孔
子海口言若含澤又夫子輔喉孝經鈞命訣 ○孔子

之勁能拓國門之關勇復孟諸足蹠狄兔不以

力聞呂氏春秋○孔子去魯佩象環五寸象言其有

文理也環可循而無窮也古禮○西狩獲麟有

告者曰有麇而角者子曰孰為來哉反袂拭面涕沾袍曰吾道窮矣公羊傳○孔子將死遺秘書

曰不知何一男子自稱秦始皇上我堂踞我牀

顛倒衣裳至沙丘而亡後始皇至魯觀孔子宅

至沙丘而亡王克論衡○鮑永為魯郡太守時彭豐

等不降闕里無故荆棘自闕從講堂掃除至孔

子廟永異之謂府丞曰方今院急而闕里無故

自滌豈夫子欲行大饗誅無狀也乃修學行鄉

禮請豐會手格殺之東觀漢記○魯哀公十六年夏

四月己丑孔子卒公誅之曰旻天不弔不憇遺

一老俾屏余一人以在位箠箠余在疚嗚呼哀

哉尼父無自律國語○孔子卒受魯君璜玉葬郭

之北泗水為之却流白虎通○鍾離意為魯相出

私錢付戶曹孔訢修孔子車身入廟拭几席劔

履男子張伯除堂下草得璧七枚懷其一以六

枚白意孔子教授堂下牀頭懸一甕召訢問訢

曰夫子甕也背有丹書意發視之中有素書曰

後世修吾書董仲舒護吾車拭吾履發吾筥鍾

孔子集語

卷一

二十九

離意壁有七張伯懷其一

鍾離意傳

孔子集語卷下



